

Escrito por
Xoves, 26 Abril 2007 09:01

Amigos/as do IEM: O próximo venres 27 de abril ás 20:30 h. na Capitanía Marítima de Baiona (rúa Elduayen) terá lugar o acto de presentación a REVISTA DE ESTUDOS MIÑORANOS. Trátase do número 5/6 correspondente aos anos 2005/06.

Para que vos fagades unha idea do seu contido indicámosvos o índice deste número. O químico e profesor do IES Escolas Proval Salvador Rodríguez Muñoz fornécenos unha achega a Os estudos meteorolóxicos no Val Miñor no primeiro terzo do século XX. Pola súa banda a arqueóloga e directora do Proxecto de Investigación Chan do Cereixo, promovido polo IEM coa axuda da Fundación Barrié de la Maza, Rosa Villar Quinteiro achéganos unha Breve memoria do proxecto de investigación arqueolóxica na Chan do Cereixo, Donas, Gondomar. Resumo da campaña de traballo de campo 2006. Ao tempo o historiador Xoán Bernárdez Vilar apórtanos parte dun estudo moito máis demorado acerca da Ora marítima que denominou O Val Miñor na “Ora marítima” de Rufius Festus Avienus.

Os medievais castelos rochedos de Santa Helena e Morgadáns no Val Miñor, en Terra de Turonio é o traballo que nos achega o arquitecto Xaime Garrido Rodríguez coa colaboración de Natalia Zunzunegui Pérez.

O profesor Xulián Maure Rivas acércanos Un monumento de Baiona escrito en 1344, mentres que Antonio Taboada Táboas aporta un estudo das marcas epigráficas da fortaleza de Monte do Boi.

O profesor Remigio Nieto González realiza un estudo de Baiona no poema cabaleiresco Orlando furioso e ofrece unha versión á nosa lingua dalgunhas páxinas da obra cimeira da lingua italiana.

“Por la Religión y el Rey, morir es ley”. Liberais e absolutistas na corporación municipal de Baiona, 1825-1836 é o estudo que realizou para este número o historiador Juan Miguel González Fernández.

A profesora María Xosé González Chamorro recupera A memoria das escolas Proval. Testemuños dos seus alumnos e alumnas entre 1909 e 1934 e Xosé Alfredo Pereira Martínez á de A usurpación dos bens da Sociedade Agraria de Belesar e as súas ensinanzas,

O naturalista César Vidal Rodríguez achéganos A Chan do Cereixo, un dos valores naturais de Gondomar en perigo. Mentres o profesor César López Rodríguez fai un estudo en detalle de As bandas de música de Baiona,

Os Vinte e cinco anos da fundación da A. VV. “O Castro” de Chandebrito é a achega de Carlos Gómez Costas. Pola súa banda o profesor Juan J. Hermida valora as Perspectivas demográficas e urbanísticas do concello de Nigrán, 2005-2016, L

O pintor baionés Caino Vasconcellos achéganos unha serie de traballos, un dos cales ilustra a portada da revista, que enmarca cun breve texto denominado Beleza roubada.

O profesor Alberto Valverde Otero recupera a memoria dos que nos visitaron e deixaron escrito sobre nós en Unha viaxe pola Galiza a través dos cadernos de Fialho de Almeida.

Presentación da revista número 5 do IEM

Escrito por

Xoves, 26 Abril 2007 09:01

As paxinas de creación correron a cargo do poeta Demetrio López Garrido, dos narradores Gonzalo Navaza e Veiga Casás, do xornalista Iglesias Viqueira e do asiduo colaborador da Revista de Estudos Miñoranos Antonio de Bade.

O acto comezará coa intervención do Coro e Grupo de Música do CEIP Covaterreña de Baiona dirixido polo profesor David Piñeiro. O membro da xunta de Goberno do IEM, Xosé Lois Vilar Pedreira fará unha presentación xenérica da Revista de Estudos Miñoranos e os colaboradores Caino Vasconcellos, César López e Remigio Nieto acercarannos a cadanseu traballo.. O acto será conducido pola profesora Concha Vilar.